

**Ulloq 22. juni 2018 Nuummi Hans Egedep Illuani nalliuttorsiorpaluttumik katerisimaarnermi Malik Høegh sølviusumik Nersornaaserneqarnerani Inatsisartut Siulittaasuata Hans Enoksenip oqalugiaataa.**

Asasara Malik Høegh,

Nuannaarutigeqaara illit qaaqusatillu sølviusumik Nersornaaserneqarnissannut maanga Hans Egedep Illuanut nalliuttorsiorpaluttumik katerisimaarnermut tikilluaqqusinnaagassi. Malik Høegh, taamatut nersorniarneqarputit nunatta nipilersornikkut oqaluttuarisaanerani nutaajunerusumi oqaluttuarisaanikkut malunnaatilimmik tunniusimallutillu sulisimanerit pissutigalugu.

Inatsisartut Siulittaasoqarfiata sølviusumik Nersornaaserpaatsit nipilersoqatigiinnut Sumekkunnut taalliatigut kulturikkut tunniussaqaarsimanikkut nunatsinnilu nutaaliaasunik nipilersornerup ineriartorneranut naleqqersuutitut malunnaatilimmik annertuumik nunarput pillugu nersortarialimmik suliaqaarsimanerit pissutigalugu.

Nipilersoqatigiit Sumekkkut, tamatta nalunngisatta sumiikkaluaraangattalu appinneqaraangata erinarsoqataaffigisinnaasatta, taalliornikkut tunuliaqutaattut oqaatigineqartarputit. Utoqqangulersunut kinguaariinnullu nutaanut kulturikkut kingornussatta nutaajunerusut ilagilersimavaasi.

Nipilersoqatigiit Sume eqqartorneqaarsinnaanngillat nunatta nipilersornikkut oqaluttuarisaanerani immikkoortoq pingaarutilik tamanna tikinnagu. Aallartissimavusi marluinnaallutik nipilersoqatigiillutillu erinarsoqatigiittartut Malik & Peritut. Sumep oqaluttuassartaanik Per Berthelsenip atuakkiaani atuarsinnaavarput “nipaatsuusutit suliainik peqqissaartuusoq suarannguit aamma iluamik inississornissaannut pingaartitsisoq. Salliulluni erinarsullaqqissorsuuvoq 12-inillu noqartilimmik guitarillaqqissorsuulluni.”

Taamaattumik oqaluttuarisaanikkut nipilersornikkullu misigisat, minnerunngitsumik illit taalliatsigut tunniussaqaarfigisimasatit, kingumut qiviarluta nuannaarutigisinnaavagut. “Inuit Nunaat” 1974-imeersup erinaa niperujoorukku qularutiginnilara tamatta oqaasertai erinaalu uaneerannguamiitissagivut.

Oqartoqarsinnaagaluartoq qanganngortoq Sumep kingullermik saqqummersitsineraniit, piffissap ingerlanerani taallat erinnallu ullutsinnut aamma tunngassuteqarnerisa uppersarparaat qanoq pingaaruteqartigisimasusi nunatta naalakkersuinikkut nipilersornikkullu oqaluttuarisaaneranut ineriartorneranullu.

Ukiut ingerlanerini ingerlassimasatit amerlaqaat, matumani tamakkerlugit taakkartorsinnaagunangisakka.

Malik Høegh, Nersornaat sølviusoq una maanna Inatsisartut sinnerlugit ilinnut tunniutiligara inuiaqatigiit sinnerlugit ilinnut qujaniarnitsinnut ersiutaagili.

Qamangga pisumik pilluarit.